

**BOSNA I HERCEGOVINA  
FEDERACIJA BOSNE I HERCEGOVINE  
ZENIČKO-DOBOJSKI KANTON  
OPĆINA KAKANJ  
Općinsko vijeće**

**Broj:** 01/1-33-Z/23

**Kakanj,** 31.10.2023. godine

**Z A P I S N I K**

**sa 33. redovne sjednice Općinskog vijeća održane 31.10.2023. godine (utorak)  
u sali Općinskog vijeća sa početkom u 9:00 sati  
(sažetak zapisnika)**

Predsjedavajući Općinskog vijeća Slaven Katičić je pozdravio prisutne i otvorio 33. redovnu sjednicu Općinskog vijeća.

Predsjedavajući je zamolio da vijećnici i vijećnice prijave svoje prisustvo.

Vijećnici i vijećnice prisutni na sjednici:

Izudin Puščul, Omer Musić, Džemal Bečirhodžić, Safet Šahman, Mejrema Purišević, Mediha Mamela, Namir Talić, Adis Mrkonjić, Elvir Delibašić, Amar Selimović, Kenan Kozlo i Izudin Hrusto (**SDA**)

Vinka Aletović, Ahmed Begić, Miroslav Spasojević i Edin Šljivo (**SDP BiH**)

Zerina Kovač, Mirsad Tursum, Fakir Ajdinović i Sabit Čehajić (**S BiH**)

Dževdet Huskić, Marcela Ravlija i Branko Češljčić (**NS**)

Enver Merdić i Mugdin Gorak (**SBB BiH**)

Adnan Čobo i Armin Bašić (**DF**)

Slaven Katičić (**HDZ BiH**)

Mujo Fafulić (**nacionalna manjina**)

**Odsutni vijećnici:** Nerma Aliefendić (**SDA**)

Predsjedavajući je konstatovao da je na sjednici u momentu prijave prisutno 29 vijećnika i vijećnica, te su se stekli svi potrebni uslovi za validan rad i odlučivanje Općinskog vijeća.

Pored vijećnika sjednici su prisustvovali:

**Mirnes Bajtarević**, općinski načelnik

**Emir Zaimović**, sekretar Općinskog vijeća – po ovlaštenju

**Džihad Berbić**, pomoćnik općinskog načelnika za finansije

**Mirza Fazlić**, pomoćnik općinskog načelnika za privredu, urbanizam i zaštitu okoline

**Bahrudin Arnaut**, pomoćnik općinskog načelnika za opću upravu radne i zajedničke poslove, lokalnu samoupravu i mjesne zajednice

**Edin Aliefendić**, pomoćnik općinskog načelnika za društvene djelatnosti, boračka pitanja, raseljena lica, izbjeglice i povratnike

**Nurudin Hrusto**, pomoćnik općinskog načelnika za civilnu zaštitu

**Mukades Delibašić**, pomoćnik općinskog načelnika za imovinskopravne, geodetske poslove i katastar nekretnina

**Zijad Neimarlija**, direktor Zavoda za planiranje i izgradnju općine Kakanj

**Mahir Sikira**, šef Stručne službe za poslove Općinskog načelnika

## Izviestioci, obrađivači, gosti

**Muamer Čelebić**, direktor JP „Grijanje“ d.o.o. Kakanj  
**Haris Veispačić**, direktor JP „Vodokom“ d.o.o. Kakanj  
**Mirsada Čaluk i Azra Čišija**, predsjednica UO i direktorica JU „Mladost“ Kakanj

## Predstavnici medija

**NTV IC Kakanj**  
**Radio Kakanj**  
**Kakanj-Info**

## Napomene o radu Kolegija Općinskog vijeća

U pripremi 33. redovne sjednice Općinskoga vijeća, Kolegij Općinskog vijeća je 23.10.2023. godine, održao sjednicu na kojoj je razmatrao:

### **a) Vijećničku inicijativu Dževdeta Huskića**

Inicijativa je nakon rasprave primljena k znanju uz konstataciju da je Kolegij Općinskog vijeća razmotrio argumente i za i protiv navedene inicijative, te da nema trenutnog koncenzusa za realizaciju iste.

### **b) Odgovor JP „Vodokom“ d.o.o. Kakanj na Zahtjev MZ Čatići u vezi odvoza luga**

Kolegij Općinskog vijeća je povodom odgovora JP „Vodokom“ d.o.o. Kakanj zauzeo stav da bi JP „Vodokom“ d.o.o. Kakanj trebao provesti anketiranje građana u mjesnim zajednicama koje su izrazile interes za odvoz luga a onda, na osnovu tih pokazatelja, da predloži modalitet sa kalkulacijom cijene. Na taj način i Kolegij a i građani bi imali jasnu sliku da li ići u izmjene odredaba Odluke o komunalnom redu koje uređuju ovu oblast.

### **c) Izjašnjenje na zahtjev TD „Nova trgovina“ d.o.o. Kakanj za produženje roka za izgradnju i primopredaju tržnice i zaključenje aneksa Ugovora o kupoprodaji nekretnine**

Kolegij je izjašnjenje Općinskog pravobranilaštva primio k znanju, te zauzeo stav da se pričekava i sa odgovorom općinskog načelnika kako bi nadležne službe, u slučaju opravdanosti zahtjeva, mogle pripremiti adekvatne materijale za usvajanje na Općinskom vijeću.

## Usvajanje zapisnika sa 32. redovne sjednice Općinskog vijeća

Nije bilo diskusije o zapisniku i isti je usvojen jednoglasno sa 28 glasova ZA.

## Komentari na dostavljene odgovore na vijećnička pitanja

**Dževdet Huskić:** je komentarisao odgovor na pitanje da li postoje mjerljivi rezultati uvođenja video-nadzora na području općine, te je tražio pojašnjenje odgovora koji je dobio od nadležne službe. Naime, u istom se između ostalog navodi da je Općina Kakanj ostvarila saradnju sa Policijskom stanicom i na zahtjev iste dostavljala snimke video-nadzora iz kojeg dijela odgovora se može zaključiti da se video-nadzor nalazi u zgradi Općine. Pitao je da li je to tačno ili je pogrešno navedeno u odgovoru. Odgovor koji je dobio od Policijske stanice je ocijenio uznemirujućim, te ga nije želio komentarisati.

## Komentari na dostavljena mišljenja na vijećničke inicijative

**Marcela Ravlija:** je u vezi podnesene inicijative za revidiranje plana odvoza smeća i izgradnje i postavljanja dodatnih kontejnera kazala da se iz odgovora koji je dobila od Vodokoma može zaključiti da najveću odgovornost za trenutno stanje snose pojedinci koji odlažu otpad pored kontejnera. Složila se da ima neodgovornih pojedinaca koji to rade, ali smatra da to nije jedini problem i istakla da Vodokom prije svega mora iznaći način da odvozi kabasti otpad koji se tada ne bi odlagao pored kontejnera. Uz to je mišljenja da se treba pozabaviti revidiranjem plana odvoza otpada iz gradskog i prigradskog područja, pogotovo u periodima kada u Kakanj dolazi dijaspora, a to je period ljetnih i zimskih godišnjih odmora, pa bi makar u tom periodu trebalo češće odvoziti otpad, odnosno prazniti kontejnere.

## Vijećnička pitanja

**Safet Šahman:** je postavio dva vijećnička pitanja. Prvo je da li je urađen idejni projekat ili u kojoj je fazi izrada idejnog projekta za most u Kondžilu? Drugo pitanje je da li je Općina Kakanj dala saglasnost za izgradnju objekata na i oko dovišta „Lastavica“, kao i da li je Općina Kakanj dala saglasnost da se vrše arheološka iskopavanja na lokaciji „Markov kamen“ iznad sela Hrastovac i Starposle?

**Marcela Ravlija:** je postavila vijećničko pitanje koliko je djece, odnosno roditelja, iskoristilo pravo na subvencionirani boravak u vrtićima? Obuhvat djece predškolskim odgojem na općini Kakanj bi trebao biti veći, dok su nedostatak kapaciteta, cijene boravka koje su za većinu roditelja visoke, samo neki od razloga ovakvog stanja, a prošle su dvije godine kako je općinski načelnik donio nove kriterije o subvencioniranju boravka djece u predškolskim ustanovama.

**Adnan Čobo:** je postavio vijećničko pitanje da li će se, odnosno da li se ima namjera u narednom periodu uzeti u rješavanje projekat uređenje korita rijeke Zgošće na dionici od mosta na „Crnoj rijeci“ do kraja naselja Zgošća ili do mosta na ulazu u naselje Zgošća, zašto je već podnio nekoliko inicijativa?

**Izudin Puščul:** je postavio vijećničko pitanje da li se vrši kontrola ispravnosti vode za piće sa lokalnih – mjesnih izvora, a koja nisu u nadležnosti JP „Vodokom“ Kakanj? Rekao je da ga interesuje da li se kontroliše ispravnost vode i u čijoj je to nadležnosti, te da li postoji zakonska obaveza kontrolisanja ispravnosti takvih izvorišta i u kojem vremenskom intervalu.

**Branko Češljic:** je postavio dva vijećnička pitanja. Prvo je da li je i kako je stigao novac planiran za doček Nove 2023. godine do penzionera i hoće li se to desiti do kraja tekuće godine? Drugo pitanje je kakvog smisla ima mapiranje kakanjske dijaspore kada je pola misleće dijaspore koja je obrazovana blokirno na službenoj stranici Općine Kakanj?

**Općinski načelnik (odgovor):** je zamolio da se definiše termin „pola dijaspore“, odnosno pitao je koliko je to „pola dijaspore“, koji je to broj, te koliko iznosi ukupan broj dijaspore, a iz razloga što mu je nejasno postavljeno pitanje.

**Branko Češljic:** je dodao da nema potrebe dodatno pojašnjavati pitanje, jer je dobro poznato ko je blokiran na zvaničnoj stranici Općine da ne može iznositi komentare.

Predsjedavajući je konstatovao da su vijećnici: Dževdet Huskić, Vinka Aletović i Kenan Kozlo postavili vijećničko pitanje bez korištenja govornice.

**Dževdet Huskić:** je postavio dva vijećnička pitanja. Prvo je kakvo je stvarno stanje sa isporukom toplotne energije prema građanstvu na početku ove sezone? Naveo je da je sezona grijanja počela prije mjesec dana, a svakodnevno se dobijaju pritužbe građana koje se tiču slabog ili nikakvog grijanja. Samo u dijelu naselja Čatići najmanje 2 sedmice nema isporuke toplotne energije. Drugo pitanje je koliko novca je u Općini Kakanj obezbijeđeno iz EU i drugih međunarodnih fondova od 2020. godine do danas? Pitanje je postavio iz razloga što je u Strategiji općine Kakanj za period 2021-2027. godina, navedeno 45 mjera za realizaciju strateških ciljeva pomenute strategije, a najmanje u četvrtini mjera se finansiranje između ostalog oslanja i na sredstva iz EU i drugih međunarodnih fondova.

**Vinka Aletović:** je postavila dva vijećnička pitanja. Prvo je kada se planira postupiti u skladu sa odobrenjem nadležnog ministarstva da se prostor na Ponijerima, na lokaciji bivšeg kamenoloma šumarije Ribnica, a sadašnjeg ŠPD-a koristi za parkiranje vozila? Napominje da je Ugovor o zakupu potpisam između Ministarstva za poljoprivredu, šumarstvo i vodoprivredu i Općine Kakanj u svrhu uređenja zemljišta i korištenja kao parking prostora, te da već ističe druga godina koncesije, a taj prostor se sve više koristi kao deponija smeća vikend naselja Ponijeri. Drugo pitanje je da li je bilo reakcija (odgovora) od strane nadležnih organa i ako nije šta se namjerava poduzeti u narednom periodu po pitanju upućenih urgencija Odsjeka za inspekcije za postupanje povodom prijave koja se odnosi na ekocid načinjen između općina Vareš i Kakanj, a radi se o nelegalnoj sječi šuma od 3.000 m<sup>2</sup> od strane kompanije „Adriatic Metals“?

**Kenan Kozlo:** je postavio vijećničko pitanje da li je završena realizacija projekta uređenja obale rijeke Bosne na potezu od „Mosta mladih“ u pravcu „Cementarskog mosta“ kojeg je finansirala Agencija za vodno područje rijeke Save? Pitanje je postavio iz razloga što su vidljivi nanosi kamenog materijala kojeg je izvođač dovukao prilikom uređenja obale, te isti još uvijek nije uklonjen.

### **Vijećničke inicijative**

**Marcela Ravlija:** je pokrenula dvije vijećničke inicijative. Prva je da se uklone šine i sanira cesta u ulici Rudarska u Čatićima obzirom da duže od dvadeset godina prijevoz uglja, koji se odvijao uskotračnom prugom sa pogona Haljinići do pogona Separacija, ne prolazi kroz Čatiće. Šine na toj dionici je uklonio RMU „Kakanj“, međutim ostale su šine na cesti koja vodi prema deponiji uglja i naselju Hrasno. Stanovnici koji žive u Rudarskoj ulici na Hrasnu, ali i radnici koji rade na deponiji uglja, svaki dan autima prelaze preko šina koje ne služe ničemu. Druga inicijativa je da se Zavodu za planiranje i izgradnju Općine Kakanj da u nadležnost održavanje rudničkog Spomen-parka. Inicijativu je podnijela iz razloga što se odgovora na postavljeno vijećničko pitanje od strane Zavoda može vidjeti spremnost da se postigne sporazum sa RMU „Kakanj“ da tekuće održavanje pređe u nadležnost Općine Kakanj, odnosno Zavoda.

**Izudin Puščul:** je pokrenuo vijećničku inicijativu da se izgradi trotoar u ulici Mehmeda Skopljaka – pored trgovine „Rima-market“. Pomenuti prostor se koristi kao parking, a pregledom katastarskih podataka može se vidjeti da lokacija niti je namijenjena za parking, niti je u vlasništvu marketa, već je u vlasništvu Općine Kakanj. Izgradnjom parkinga na toj lokaciji ukinut je trotoar, pa pješaci prolaskom tom dionicom često moraju sići na saobraćajnicu kako bi zaobišli parkirane aute, te na taj način ugrožavaju i sebe i ostale učesnike u saobraćaju. Napomenuo je da se u neposrednoj blizini nalazi škola.

**Safet Šahman:** je pokrenuo dvije vijećničke inicijative. Prva inicijativa da se odobre sredstva u iznosu od 5.000 KM za dovršetak radova javne rasvjete u Gornjim Starposlima i oko džamije u Starposlima. Druga inicijativa je da se održi zajednički sastanak predstavnika MZ Krševac, općinskih vijećnika sa prostora MZ Krševac, Odbora za vodu podružnice Varalići i predstavnika JP „Vodokom“ d.o.o. Kakanj, a vezano za problem vodosnabdijevanja 19 domaćinstava u novom naselju u blizini ambulante. Rekao je da sastanku mogu prisustvovati i predstavnici JU „Dom zdravlja sa stacionarom“ Kakanj ukoliko planiraju pustiti u rad ambulantu Krševac.

**Armin Bašić:** je pokrenuo dvije vijećničke inicijative. Prva inicijativa da se iza zgrade K2 na dijelu između zgrade i platoa od betonskih ploča, ispred kafića „Ede“ i drugih, sa gornje strane postave betonski stubići i tako onemogućiti kretanje vozila na toj dionici. Naveo je da su stubići bili postavljeni u prethodnom periodu pa su nekada uklonjeni ili uništeni, a kretanje automobila na površinama predviđenim za pješake uzrokuje opasnost za stanare okolnih zgrada, a posebno djece. Druga inicijativa je da se hitno orežu stabla i poprave rasvjetna tijela u Ulici branilaca, tačnije od kafića „Moca“ prema „Đuđinom mostu“ uz biciklističku stazu, jer je u tom dijelu grada u posljednjih godinu dana izvršeno više krivičnih djela krađe, a jedan od osnovnih uzroka je mrak u ovoj ulici. Također, nekoliko ispravnih rasvjetnih tijela zarasla su u krošnjama drveća koje je neophodno orezati jer prijete i objektima u blizini, te parkiranim vozilima, a uz to u slučaju većeg snijega, postoji opasnost od lomljenja grana i nastanka materijalne štete na vozilima.

**Adnan Čobo:** je pokrenuo dvije vijećničke inicijative. Prva inicijativa je da se stari zanat izrade rukotvorina, posuđa, reljefa u bakru, kojim je ovladao dio romske populacije, proglasi zanatom od posebnog značaja za Općinu Kakanj u kulturološkom smislu, te da se u skladu s tim Općina prema istom počne tako i ophoditi. U tom smislu je predložio da se na industrijskoj zoni u Kakanju omogući besplatan radni prostor osobama koje se bave tim zanatom, omogući obuka zainteresiranim osobama da se bave tim zanatom i da se identificiraju osobe – naivni umjetnici – nosiosi ovog zanata. Druga inicijativa je da se u skladu sa zakonskim procedurama proširi sistematizacija radnih mjesta Općine Kakanj, te formira odjeljenje za upravljanje videonadzorom i evidenciju događaja bitnih po pitanju Civilne zaštite na području općine Kakanj sa četiri zaposlena radnika i to 2 VSS tehničke struke i 2 SSS – referenta. Inicijativu je podnio zbog činjenice da Općina Kakanj već dugo pokušava realizirati projekt videonadzora, pa smatra da je to prilika da se uradi jedan potpun, kvalitetan i svrsishodan projekt. U smislu marketinga Općina Kakanj bi bila prva općina sa potpuno uređenim i kvalitetno definisanim videonadzorom, a sve u cilju sigurnosti ljudi i imovine.

**Sabit Čehajić:** je pokrenuo vijećničku inicijativu da se obezbijede sredstva za obnovu premjera na području katastarskih općina Krševac, Brnjic, Hrastovac, Bičer na području kojih je avio-snimanjem izostavljen veliki broj katastarskih čestica. U navedenim katstarskim općinama avio-snimanjem je izostavljena velika površina privatnih parcela, pa se u katastru vode kao vlasništvo ŠPD-a, a po ZK-evidenciji su privatno vlasništvo.

**Branko Češljic:** je pokrenuo vijećničku inicijativu da se riješi sve češći problem pasa lotalica u seoskim područjima. Rekao je da je potrebno konačno napraviti azil za pse, jer se ljudi ne osjećaju sigurno na ulicama, posebno stariji ljudi i djeca.

Predsjedavajući je konstatovao da su vijećnici: Dževdet Huskić, Fakir Ajdinović, Adis Mrkonjić, Omer Musić i Kenan Kozlo podnijeli vijećničke inicijative bez korištenja govornice.

**Dževdet Huskić:** je pokrenuo dvije vijećničke inicijative. Prva inicijativa da se temeljito operu gradske i prigradske ulice, jer se tokom posljednjih kiša moglo vidjeti i osjetiti pod gumama vozila koliko su gradske i prigradske ulice masne od prljavštine i prašine. Smatra da bi bilo ispravno da se prije padavina i niskih temperatura izvrši temeljito pranje (ne sapiranje) gradskih i prigradskih ulica. Druga inicijativa je da se izgradi i uredi parking za posjetioce Gradskog groblja iz razloga što već dugi niz godina postoji opravdana potreba za parkingom kod Gradskog groblja. Predložio je da se taj problem djelimično riješi izgradnjom parkinga iznad groblja i trafo-stanice, gdje bi se moglo izgraditi 5-10 parking mjesta.

**Fakir Ajdinović:** je pokrenuo dvije vijećničke inicijative. Prva inicijativa da se postave kontejneri u MZ Dumanac u blizini područne škole u Rošćevini, obzirom da na navedenoj lokaciji petkom mještani zaseoka Podvinje tu odlažu vreće od smeća, jer nemaju riješeno pitanje odvoza smeća ispred porodičnih kuća, iako uredno izmiruju obaveze prema JP „Vodokom“ d.o.o. Kakanj. Druga inicijativa je da se u Budžetu Općine Kakanj za 2024. godinu planiraju sredstva za obavljanje sistematskog ljekarskog pregleda za budžetske korisnike, zaposlene u organu uprave i javnim ustanovama koji se finansiraju iz općinskog budžeta, a imajući u vidu i preporuku WHO da bi se preventivni zdravstveni pregledi trebali provoditi redovno, jednom godišnje ili barem svake dvije godine.

**Adis Mrkonjić:** je pokrenuo dvije vijećničke inicijative. Prva inicijativa da se izvrši sanacija oštećenja (rupa) na putu Kakanj – Tršće koje su nastale kao posljedica pojačanog transporta teretnih vozila. Druga inicijativa je da se izvrši sanacija dijela puta kod džamije u Tršću kojom bi se sanirale rupe, te asflatom povezoao betonski kanal sa glavnim putem. Naveo je da se na tom dijelu puta, za vrijeme padavina, formiraju velike lokve koje otežavaju odvijanje saobraćaja kao i kretanje pješaka, posebno djece. Uz to, u zimskom periodu zbog korištenja grtalice za snijeg, postoji mogućnost da se ošteti betonski kanal obzirom da nije adekvatno obrađen (asfaltiran) prostor između kanala i glavnog puta.

**Omer Musić:** je pokrenuo vijećničku inicijativu da se riješi problem pasa lotalica u Ulici branilaca koji se uglavnom kreću oko novoizgrađenih stambenih jedinica do Elektrodistribucije uz glavnu saobraćajnicu. Naveo je građani imaju veliki problem sa tim, a nerijetki su i napadi tih pasa, naročito u večernjim satima kada se psi skupljaju u čopore. To izaziva dozu straha kod svih koji se tom lokacijom kreću, a česti su i upiti građana povodom ovog problemam, jer je on sveprisutan u gradu.

**Kenan Kozlo:** je pokrenuo dvije vijećničke inicijative. Prva inicijativa se odnosi na uklanjanje riječnih nanosa i produbljenje korita rijeke Bosne na najkritičnijim mjestima na području općine Kakanj, zbog nadolazećeg perioda učestalih kiša, kada građani Kaknja koji žive u priobalnim područjima rijeke Bosne, strahuju od mogućih poplava. Druga inicijativa je da se postave betonski stubići na šetalištu kraj rijeke Bosne u Ulici branilaca. Razlog za istu je što je dio šetališta uz rijeku Bosnu u Ulici branilaca skoro u istoj visini sa regionalnom cestom, što ugrožava građane koji prolaze šetalištem, prvenstveno djecu koja se tim putem kreću prema školi, a često se tu parkiraju i vozila.

### **Utvrđivanje dnevnog reda**

Predsjedavajući je za 33. redovnu sjednicu predložio dnevni red koji je usaglašen na sjednici Kolegija i predložio da se u dnevni red uvrste naknadno pristigli materijali i to: Prijedlog rješenja o imenovanju Komisije za provođenje javnog nadmetanja-licitacije pri prodaji poslovnih prostora u vlasništvu Općine Kakanj (tačka 7. dnevnog reda), Prijedlog rješenja o razrješenju predsjednika NO JU Kulturno-sportski

centar Kakanj (tačka 10. dnevnog reda) i Prijedlog rješenja o privremenom imenovanju predsjednika NO JU Kulturno-sportski centar Kakanj (tačka 11. dnevnog reda). Osim toga rekao je da je predlagač povukao sa dnevnog reda prve dvije tačke koje su se nalazile u pozivu i to: Prijedlog odluke o nabavci nekretnine (lokacija: Stara jama) i Prijedlog odluke o pokretanju procedure dugoročnog kreditnog zaduženja Općine Kakanj u 2023.godini.

Kako nije bilo primjedbi na predloženi dnevni red isti je jednoglasno usvojen sa 29 glasova ZA.

### **Usvojeni dnevni red**

1. Prijedlog odluke o dopuni Odluke o utvrđivanju cijena komunalne usluge održavanja javne rasvjete
2. Prijedlog odluke o učešću Općine Kakanj u realizaciji nastavka Programa podrške zaštiti ljudskih prava (Podrška razvoju poslovnog sektora Općine Kakanj za period 2023-2026. godina)
3. Prijedlog odluke o izdvajanju novog naselja Bare iz MZ Kakanj I i pripajanje MZ Plandište
4. Razmatranje Izvještaja o realizaciji Godišnjeg programa rada za 2022/2023 godinu JU za predškolski odgoj i obrazovanje „Mladost“ Kakanj
5. Razmatranje Godišnjeg programa rada za 2023/2024 godinu JU za predškolski odgoj i obrazovanje „Mladost“ Kakanj
6. Prijedlog zaključka o davanju saglasnosti na Odluku NO JP „Vodokom“ d.o.o. Kakanj
7. Prijedlog rješenja o imenovanju Komisije za provođenje javnog nadmetanja-licitacije pri prodaji poslovnih prostora u vlasništvu Općine Kakanj
8. Prijedlog rješenja o privremenom imenovanju člana UO JU Centar za socijani rad Kakanj
9. Prijedlog rješenja o privremenom imenovanju člana Skupštine JP „Vodokom“ d.o.o. Kakanj
10. Prijedlog rješenja o razrješenju predsjednika NO JU „Kulturno-sportski centar“ Kakanj
11. Prijedlog rješenja o privremenom imenovanju predsjednika NO JU „Kulturno-sportski centar“ Kakanj

### **1. Prijedlog odluke o dopuni Odluke o utvrđivanju cijena komunalne usluge održavanja javne rasvjete**

**Predlagač:** Skupština JP „Grijanje“ d.o.o. Kakanj

**Obradivač:** Skupština JP „Grijanje“ d.o.o. Kakanj

**Izjavitelj:** Muamer Čelebić, direktor JP Grijanje“ d.o.o. Kakanj

U diskusiji nije niko učestvovao i Vijeće je usvojilo Odluku o dopuni Odluke o utvrđivanju cijena komunalne usluge održavanja javne rasvjete sa 24 glasa ZA, bez glasova PROTIV i 5 glasova UZDRŽAN.

### **2. Prijedlog odluke o učešću Općine Kakanj u realizaciji nastavka Programa podrške zaštiti ljudskih prava (Podrška razvoju poslovnog sektora Općine Kakanj za period 2023-2026. godina)**

**Predlagač:** Općinski načelnik

**Obradivač:** Služba za privredu, urbanizam i zaštitu okoline

**Izjavitelj:** Mahir Sikira, šef Stručne službe za poslove Općinskog načelnika

U diskusiji je učestvovala Marcela Ravlija.

**Marcela Ravlija:** je kazala da podržava sve aktivnosti koje podrazumjevaju osnaživanje statusa žena, pogotovo marginaliziranih grupa, ali je istakla nezadovoljstvo zbog činjenice da Općina Kakanj nije usvojila Gender akcioni plan, jer smatra da bi se moglo obezbjediti više sredstava sa raznih nivoa za osnaživanje žena u svim segmentima. Podsjetila je da je Vijeće ministra BiH u tekućem mjesecu usvojilo Gender akcioni plan na nivou BiH za period 2023-2027. godina.

Nakon diskusije Vijeće je usvojilo Odluku o učešću Općine Kakanj u realizaciji nastavka Programa podrške zaštiti ljudskih prava (Podrška razvoju poslovnog sektora Općine Kakanj za period 2023-2026. godina), jednoglasno sa 29 glasova ZA.

### **3. Prijedlog odluke o izdvajanju novog naselja Bare iz MZ Kakanj I i pripajanje MZ Plandište**

**Predlagač:** Općinski načelnik

**Obrađivač:** Služba za opću upravu, radne i zajedničke poslove, lokalnu samoupravu i mjesne zajednice

**Izjavitelj:** Bahrudin Arnaut, pomoćnik općinskog načelnika

U diskusiji nije niko učestvovao i Vijeće je jednoglasno sa 29 glasova ZA usvojilo Odluku o izdvajanju novog naselja Bare iz MZ Kakanj I i pripajanje MZ Plandište.

### **4. Razmatranje Izvještaja o realizaciji Godišnjeg programa rada za 2022/2023 godinu JU za predškolski odgoj i obrazovanje „Mladost“ Kakanj**

**Predlagač:** UO JU za predškolski odgoj i obrazovanje „Mladost“ Kakanj

**Obrađivač:** UO JU za predškolski odgoj i obrazovanje „Mladost“ Kakanj

**Izjavitelj:** Azra Čišija, direktorica JU i Mirsada Čaluk, predsjednica UO JU

U diskusiji su učestvovali: Marcela Ravlija i Izudin Puščul.

**Marcela Ravlija:** je Izvještaj ocijenila kao sadržajan i obiman, te istakla da se iz prikazanih tabela i brojeva ne može zaključiti koliki rad, trud i zalaganje je uloženo od strane svih uposlenica JU kako bi djeca imala što bolje uslove i okruženje za razvijanje svih svojih kapaciteta, a sve u cilju da sutra ta djeca postanu zdravi i uspješni članovi društva.

**Izudin Puščul:** je pohvalio Izvještaj i rekao da se iz njega vidi da se u JU „Mladost“ ozbiljno i kvalitetno radilo, te se nada da će tako biti i u budućnosti, pa je u tom kontekstu pozvao općinskog načelnika i sve službe da koliko god je moguće pomognu JU da nastavi sa razvijanjem i uspješnim radom.

Nakon diskusije Vijeće je usvojilo Zaključak o prihvatanju Izvještaja o realizaciji Godišnjeg programa rada za 2022/2023 godinu JU za predškolski odgoj i obrazovanje „Mladost“ Kakanj, sa 28 glasova ZA, bez glasova PROTIV i 1 glas UZDRŽAN.

### **5. Razmatranje Godišnjeg programa rada za 2023/2024 godinu JU za predškolski odgoj i obrazovanje „Mladost“ Kakanj**

**Predlagač:** UO JU za predškolski odgoj i obrazovanje „Mladost“ Kakanj

**Obrađivač:** UO JU za predškolski odgoj i obrazovanje „Mladost“ Kakanj

**Izjavitelj:** Azra Čišija, direktorica JU i Mirsada Čaluk, predsjednica UO JU

U diskusiji nije niko učestvovao i Vijeće je jednoglasno sa 28 glasova ZA usvojilo Zaključak o davanju saglasnosti na Godišnji program rada za 2023/2024 godinu JU za predškolski odgoj i obrazovanje „Mladost“ Kakanj.

### **6. Prijedlog zaključka o davanju saglasnosti na Odluku NO JP „Vodokom“ d.o.o. Kakanj**

**Predlagač:** NO JP „Vodokom“ d.o.o. Kakanj

**Obrađivač:** NO JP „Vodokom“ d.o.o. Kakanj

**Izjavitelj:** Haris Veispahić, direktor JP „Vodokom“ d.o.o. Kakanj

U diskusiji niko nije učestvovao i Vijeće je usvojilo Zaključak o davanju saglasnosti na Odluku NO JP „Vodokom“ d.o.o. Kakanj, sa 26 glasova ZA, bez glasova PROTIV i 2 glas UZDRŽAN.

### **7. Prijedlog rješenja o imenovanju Komisije za provođenje javnog nadmetanja-licitacije pri prodaji poslovnih prostora u vlasništvu Općine Kakanj**

**Predlagač:** Komisija za izbor i imenovanja

**Obrađivač:** Služba za imovinskopravne, geodetske poslove i katastar nekretnina

**Izjavitelj:** Mediha Mamela, predsjednica Komisije

**Mediha Mamela:** je ispred Komisije za izbor i imenovanja predložila da se u Komisiju za provođenje javnog nadmetanja-licitacije pri prodaji poslovnih prostora u vlasništvu Općine Kakanj imenuju: Armin Bašić – predsjednik, Vjekoslav Grubešić, Velida Murtić, Edina Šehić, Adrijana Bilalović, Almir Mehić, Almedin Tursum i Alen Knežević – članovi.

U diskusiji nije niko učestvovao i Vijeće je usvojilo Rješenje o formiranju Komisije za provođenje javnog nadmetanja-licitacije pri prodaji poslovnih prostora u vlasništvu Općine Kakanj u sastavu: Armin Bašić – predsjednik, Vjekoslav Grubešić, Velida Murtić, Edina Šehić, Adrijana Bilalović, Almir Mehić, Almedin Tursum i Alen Knežević – članovi, sa 27 glasova ZA, bez glasova PROTIV i 2 glasa UZDRŽAN.

Vijeće je vodilo objedinjenu raspravu po tačkama 8., 9., 10. i 11. dnevnog reda, a glasanje je obavljeno pojedinačno.

#### **8. Prijedlog rješenja o privremenom imenovanju člana UO JU Centar za socijani rad Kakanj**

#### **9. Prijedlog rješenja o privremenom imenovanju člana Skupštine JP „Vodokom“ d.o.o. Kakanj**

#### **10. Prijedlog rješenja o razrješenju predsjednika NO JU „Kulturno-sportski centar“ Kakanj**

#### **11. Prijedlog rješenja o privremenom imenovanju predsjednika NO JU „Kulturno-sportski centar“ Kakanj**

**Predlagač:** Komisija za izbor i imenovanja

**Obrađivač:** Stručna služba za poslove Općinskog vijeća

**Izjavitelj:** Mediha Mamela, predsjednica Komisije

**Mediha Mamela:** je ispred Komisije za izbor i imenovanja predložila da se privremeno za člana UO JU Centar za socijani rad Kakanj imenuje Vjekoslav Grubešić, a da se privremeno za člana Skupštine JP „Vodokom“ d.o.o. Kakanj imenuje Zoran Jozinović, te je predložila da se dužnosti predsjednika NO JU „Kulturno-sportski centar“ Kakanj razriješi Mustafa Subašić, zbog podnesene ostavke, a da se privremeno za predsjednika NO JU „Kulturno-sportski centar“ Kakanj imenuje Milijana Terzić.

U diskusiji nije niko učestvovao pa je Vijeće usvojilo Rješenje o privremenom imenovanju Vjekoslava Grubešića za člana UO JU Centar za socijani rad Kakanj, sa 21 glas ZA, bez glasova PROTIV i 6 glasova UZDRŽAN, Rješenje o privremenom imenovanju Zorana Jozinovića za člana Skupštine JP „Vodokom“ d.o.o. Kakanj, sa 23 glasa ZA, bez glasova PROTIV i 4 glasa UZDRŽAN, Rješenje o razrješenju Mustafe Subašića sa pozicije predsjednika NO JU „Kulturno-sportski centar“ Kakanj, sa 20 glasova ZA, bez glasova PROTIV i 7 glasova UZDRŽAN, te Rješenje o privremenom imenovanju Milijane Terzić za predsjednika NO JU „Kulturno-sportski centar“ Kakanj, sa 23 glasa ZA, 1 glas PROTIV i 3 glasa UZDRŽAN.

Predsjedavajući je zaključio rad 33. redovne sjednice Općinskog vijeća u 10:30 h.

Audiozapis sa sjednice Vijeća pohranjen je u elektronskoj formi (CD-u) i sastavni je dio ovog Zapisnika.

**SEKRETAR  
OPĆINSKOG VIJEĆA**  
-po ovlaštenju-  
Emir Zaimović

**PREDSJEDAVAJUĆI  
OPĆINSKOG VIJEĆA**  
Slaven Katičić